


救荒活民書 卷一

特1
277

救荒活民書 卷一



特1
277

27. 3. 15



書

救

荒

活

民

青立



特1-277

救荒活民書補遺序
漢經氏校天木

救荒活民書補遺序

救荒活民書乃董煟編集二百七十八條至王炳翻刊又止二百一十四條今江陰右族朱熊維吉博雅好古志圖利澤於方來遂重加考訂芟其浮靡補其遺失增益至三百三十八條上自唐虞三代以及漢唐宋元其君臣論答凡有益於救荒者錄之間亦附以論斷并謹錄

國朝

列聖詔勅及為善陰隲書內有關於備荒之政者

文苑活民書 序



求方活民書
悉取編入名曰救荒活民補遺書其用心可謂
仁且博矣凡居祿位而專司牧之任者獲觀是
書而克遵行罔不有備雖值旱澇黎民豈有阻
饑之患哉觀維吉處江湖之遠而惓惓以斯爲
務則居廟堂之上總百揆而安養元元者可不
於此加勉此誠仁政之大端也維吉平昔操履
卓異篤孝二親勇於爲善宣德中母范氏膺疾
百藥不効維吉盟天刲股者再疾遂痊正統辛
酉歲歉維吉卽出粟四千石輸官賑給以祈二

親康泰獲蒙賜

勅旌嘉其父子孝義光揚閭里士夫稱頌播之聲
詩此予所稔知者今復以是書請於父善慶致
書徵予爲序欲鈔梓印行予弗克辭遂併書此
于卷首特以旌維吉有篤孝輕財尚義之誠恤
災捍患惠民之志而尤慶夫天下後世賴是書
而永臻乎熙皞太平之盛矣是爲序

正統七年歲次壬戌七月七日資德大夫正治
上卿禮部尙書前

太子賓客兼國子祭酒郡人胡濙序

救荒活民書補遺序

救荒活民補遺書者江陰朱維吉氏所輯也宋嘉泰中從政郎董煟有志於惠民慮夫凶歲或有不遂其生者乃取歷代救荒之政賢士大夫議論施設之方爲書三卷上之朝廷而頒於中外其用心仁矣有元張光大又取當時救災恤民之事編萃而附益之其心猶煟之心也至今二百餘年矣維吉得而觀之曰是書也民命之所係也其可以弗傳乃爲正其僞補其缺而去

其繁文又以本朝

列聖所下詔勅有關於荒政者及采為善陰隲所載前代救荒之人續之間以己意為之論斷名曰救荒活民補遺書請予文善慶甫鈺梓以傳四方欲使天下長民君子一遇凶年舉而措之庶幾斯民無一不得其所維吉之心何其仁哉朱氏江陰故家而維吉為最孝刲肉以愈母疾蓋士大夫固以歌咏之矣

聖天子篤意養民慮有水旱之災詔諸有司豫為

備維吉念父有德未沾一命即出穀四千石以歸有司助賑貸冀假寵以為親榮

朝廷降勅旌其孝義復其家維吉初以孝聞而繼以義顯予嘉其能進於善皆為文以張之今觀是書而又知其仁也然仁必自近始于遠者或遺勢有所不逮也故必思所以繼之苟有以繼之則仁之施溥矣維吉之惠施於鄉而未能及於天下故繼之以是書使是書也傳之於無窮則維吉之惠之及於人者豈有窮哉故為序之

使傳焉


正統八年十一月朔日資善大夫吏部尚書兼

經筵官前

國史總裁泰和王直序

救荒活民書補遺序


仁義之施有可行於一時者有可行於久遠者
行於一時者必出於已盡其力而為之而其惠
利及於人者淺以狹行於久遠者不必出於已
不費已之力而其惠利及於人者廣以博夫以
一鄉一隅一間里之間遇凶荒之歲有饑餓流
離而不能給者吾力足以勉而為之若夫至於
一郡一邑以極于四方吾雖欲周之而力有不
贍焉今歲饑吾有以濟之來歲饑吾有以濟之



比連歲再饑吾雖欲濟之而力有不贍焉然則
一將奈何夫事不出於己不費己之力而能使其
惠利及於人者廣而又極於久且遠是必有其
道也古之人其在上者能言之而又能行之其
在下者能言之而又能行之其効固已驗白於
當時而垂諸簡策苟能舉而措之亦猶是也譬
之公輸子之極其巧也宮室器用之美利於世
師曠之極其聰也鐘鼓管籥之音被於樂宜莫
能過之然後世循其規矩而製之則器宇之利

亦古之公輸子也比其律呂而調之則音樂之
和亦古之師曠也孰謂古今人不相及哉江陰
朱維吉詩禮右族也善事父母以孝聞與其尊
府善慶尤勇於爲義正統辛酉
朝廷使下郡邑行備荒之政維吉父子相繼出粟
四千石以實官廩使者以

聞朝廷以其父子能盡孝義降
璽書旌異鄉人榮之維吉猶以利之及人者淺而
國恩深厚思有以廣之久遠者以圖其報而不能



及見董煟救荒活民書慨然喜曰吾思之而未
得者其在茲乎反覆羨慕惜乎歲久殘缺而所
遺尚多于是考諸載籍自唐虞至于今救災備
荒之政采而備述之有行於一方而可行於天
下者有行於一時而可行於萬世者在斟酌損
益隨其地之所宜人之所便而施之無不可者
如使今之方面大臣與郡縣之吏留心於此而
力行之則雖九年之水七年之旱固無足憂而
堯舜亦何所病焉夫如其爲利豈不廣且博

而其爲惠豈不久且遠哉吁維吉之用心亦可
謂仁也矣維吉未有爵祿之榮職任之寄徒以

一

璽書之褒而惓惓思所以効報如此今有居高位
享厚祿受

褒嘉之命而玩愒歲月尸居素食於民隱畧不加
之意焉者觀於此獨不有愧哉此維吉之所以
可重也歟維吉旣稟命於尊府以是書鏡諸梓
而名之曰救荒活民補遺書遣人走京師求子

序予以其有益於世也故序之

正統八年

朝列大夫國子祭酒金陵李時勉序

救荒活民書補遺序

孟子謂人皆有不忍人之心惟聖人全體此心故其所行無非不忍人之政觀於

聖朝救荒之舉有足徵矣江陰朱熊維吉嘗出穀數千石以助有司賑饑蒙

朝廷賜璽書旌其義矣既而愧其出所以助賑者不廣復取政郎董煇所纂述救荒活民書補其遺逸錢梓以行於世冀有以助行不忍人之政者萬一其又非所謂上有好者下必有甚焉者

歟嘗觀七八月之間旱油然作雲沛然下雨人知蒙澤潤於天矣而不知雲山川之氣所蒸雨溪澗之水所升輸小以成大也出秦華之產發江海之藏人知受惠利於地矣而不知秦華江於不忍人之政其猶山川溪澗之輸於天涓埃之資於地者乎况是書有古昔聖賢暨我國家仁民之意載諸訓典誰謂不足以弘其所濟邪在典牧者用之惟其宜耳維吉有孝行見稱

於鄉其所以倦倦於義者孰非是心之推間以書求余序故爲之書

正統八年十一月甲寅翰林學士奉議大夫兼修

國史兼

經筵官廬陵陳循序

救荒活民書補遺序

歷代荒政散見於經史傳記未易遍觀而盡識
况於行乎近世董煇嘗抽簡冊撮其機要輯爲
救荒活民一書板行于世覽者便之然歲月既
久不無殘闕比年江陰朱維吉因煇所輯重加
考訂而益以

國朝勤恤民隱詔令與凡爲善陰隲諸書所載前
人救賑民饑良法美意謂之補遺由是歷代救
荒之政制度條目莫不畢具可舉而行其用心

救荒活民書
斯亦勤矣書成攜至京師求予序之予謂維吉
布衣之士坐誦書史慨然思當世之務託於此
書以自見志有在焉蓋朱氏世有及人之功至
維吉孝行尤篤嘗出粟助官賑貸於是鄉民賴
以存活

朝廷嘉其孝義旌表其門維吉方且夙夜感激思
報

國恩故復爲是書冀少裨政治之萬一仁人君子
有志及民者誠置一帙講之於平居無事之時

施之於倉卒應變之際殆見歲有凶荒而民無
菜色豈非爲政之當務哉嗚呼使維吉得位行
道舉而措之其及人之功又何如耶庸序其槩
引諸卷端

正統七年六月初吉國子司業郡人趙琬序

重刊救荒活民書補遺序

孟子謂人皆有不忍人之心而以推之於政治
可達之天下是心也固有之非本無而責之有
也有是心而行是政可以除民之害而全其生
小之惠一方大之澤天下被後世與天地所以
生物之心無異施焉斯不謂之仁矣乎予舟之
過浙也方伯徐公偕其寮佐閔公潘公劉公辱
左顧予語及民隱浙與歙病甚也財匱於供億
也粟傷於水旱也不有賑之轉溝壑者可勝計

耶諸公曰中丞許公方領巡視之

命悉心民瘼察知其然議舉荒政而修之吾儕既
遵行之由浙及歙民駸駸然生意久矣予喜曰
舟行浹旬乃今始聞民獲蘇息於公幸莫大焉
徐公曰未也公方以爲澤被於一方孰與浹於
天下利盡於一時孰與垂於無窮救荒一書活
民之至要也其猶醫經之素難矣乎宋董煟之
所編也元張光大之所續也我

明朱熊氏之所補遺也其刊布之四方俾受民社

之寄者獲觀是編當夫災異之侵於歲老稚之
沾於亡而爲之司牧相與檢視之講求其可行
者而致之民于以起之捐瘠之餘而納之生全
之地利不博且久哉且近時

廷議所行預荒之策最吏之宜蓋我

孝宗皇帝洎

今上皇帝所以字恤元元之仁於是乎在皆可示
有永之傳者也因出是書所藏善本命之校讐
併鐫梓焉予益喜曰此施藥不如施方之義是

救荒活民書
編出雖有水旱之災民無菜色野無饑殍矣不
大幸歟諸公因以序屬辭不獲夫救荒之政與
療疾之醫同一起人於死而生之之術也荒弗
爲救疾弗爲療坐視吾人捐瘠以喪命伏枕而
待斃所謂不忍人之心將安在哉故荒政仁政
也醫仁術也醫之救人近在目前雖不令之而
人多業之者荒政足以活人多矣而人往往忽
焉不之講求先事則視若不切而莫爲之備臨
事則漫無所措卒付之無可奈何而已心之用

與不用而仁澤之流塞隨之比人之轉死也可
盡委之天邪於乎惻隱之心仁之端也人皆有
之也有是心無是政徒善爾有人於此以是心
而寓之政以是政而布之法由是而垂無窮焉
其仁可勝用也哉若中丞公慮民之轉乎溝壑
當其事既有以生之而又爲之致深長之思垂
悠久之計其用心之仁也爲何如諸公之心又
皆心公之心而相與圖濟厥美非同善而必成
者歟異時被災之民受有司賑恤之仁以全垂

亡未盡之命固必有賴是書之流布者矣譬之
病者藥而起之曰醫之功也信已而謂註方書
者無與焉可乎哉

正德庚寅三月既望

賜進士及第翰林院

國史修撰儒林郎新安唐皋序

救荒活民書卷一

宋 董 煇 編著

元 張光大 新增

江陰朱 熊 補遺

澶淵王崇慶 釋斷

海虞顧雲程 校閱

帝曰棄黎民阻饑汝后稷播時百穀禹曰洪水滔
天浩浩懷山襄陵下民昏墊子乘四載隨山刊木
暨益奏庶鮮食予决九川距四海濬畎澮距川暨



稷播奏庶艱食鮮食懋遷有無化居烝民乃粒萬
邦作又

董煇曰唐虞之時國用尚簡上之人取於民
者甚少凡山澤之利盡在於民故當阻饑之
際特使通融有無而已今世民困財竭則通
融有無須上之人有以爲之然規模淺陋者
猶滯於一隅殊失唐虞懋遷之意

王崇慶曰虞廷命官播穀以濟阻饑此萬世
救荒之始

孟子曰天下之生久矣一治一亂當堯之時天下
猶未平洪水橫流汎濫於天下草木暢茂禽獸繁
殖五穀不登禽獸逼人獸蹄鳥跡之道交於中國
堯獨憂之舉舜而敷治焉舜使益掌火益烈山澤
而焚之禽獸逃匿禹疏九河濬濟漯而注之海决
汝漢排淮泗然後中國可得而食也當是時也禹
八年於外三過其門而不入后稷教民稼穡樹藝
五穀五穀熟而民人育

朱熊曰天之災異無時無之雖唐虞二代或

不免焉而所以不至於大害者以其主明臣
哲而能預備故也蠢蠢烝黎甘於汨溺不有
在上者化之使得其養生之道奚能免於困
篤哉禹之功大矣微禹吾其魚乎

王崇慶曰水患平地利興亦自然之勢觀禹
稷所以生養安全其民異乎後世之坐視殃
民矣

管子曰天以時爲權地以財爲權人以力爲權君
以令爲權失天之權則人地之權亡湯七年旱禹

九年水民之無檀賣子者湯以莊山之金鑄幣而
贖民之無檀賣子者禹以歷山之金鑄幣而贖民
之無檀賣子者故天權失人地之權皆失也夫紀
曰伊尹言於王發莊山之金鑄幣通有無於四方
以賑之民是以不困

朱熊曰天地之寶藏唯聖人爲能發之聖人
發之而不私之持其衡而變通之以待夫民
之厄困也所以煎山煮海而不爲貪羽禽革
獸而不爲暴胼手胝足而不爲虐者何與民

利其利也禹湯二聖鑄莊歷之金作幣以便民而民亦因以濟九潦七旱此非聖人之能事乎管氏此言豈無據哉

王崇慶曰發金鑄幣有無當不必泥然禹湯仁政固自可考

湯旱而禱曰政不節歟使民疾歟何以不雨而至斯極也宮室崇歟婦謁盛歟何以不雨而至斯極也苞苴行歟讒夫昌歟何以不雨而至斯極也董煇曰公孫弘以湯之旱爲桀之餘烈遂有

以啟武帝之玩心大抵天變如父母之震怒爲人子者知其雖非在己之過亦當恐懼敬事以得父母之歡心成湯聖人平時豈有此六事然必一一以爲言者所以見其敬天之至也况未至成湯者可不自責哉

王崇慶曰湯以自責而雨見人王修德可以回天

大司徒以荒政十有二聚萬民一曰散利二曰薄征三曰緩刑四曰弛力五曰舍禁六曰去幾

關市藏樂

也七曰青禮凶荒殺禮八曰殺哀九曰蕃樂蕃讀為藩謂閉不譏

器而十曰多昏十有一曰索鬼神求廢祀而修之也十有

二曰除盜賊 釋曰大司徒今戶尚書是也

董煟曰周禮救荒以散利薄征居其首今之

郡縣專促辦財賦而諱言災傷州縣之官有

抑民告訴者檢視之官有不敢報明分數者

非不識古人活民之意顧亦迫於諸司之征

催有所不暇計慮耳然以生民社稷為念者

忍無策以處之乎



王崇慶曰十二荒政先王不得已而權時之

變非恒久之道也如曰除盜賊是也庶幾焉

者其薄征殺禮乎

大荒大札則令邦國移民通財舍禁弛力薄征緩

刑

董煟曰謹按注云大荒大凶年也大札大疾

疫也移民者辟災就賤也其有守不可移者

則輸之粟梁王移民移粟之舉正得周禮救

荒之遺意而孟子不取者非不取夫此也特



譏其平居無事不能行仁政徒知罪歲而已耳

王崇慶曰民饑餓則病勢也先王所以曲處之者當如此

遣人掌邦之委積以待施惠鄉里之委積以恤躄厄門關之委積以養老孤郊里之委積以待賓客野鄙之委積以待羈旅縣都之委積以待凶荒

董煇曰今之義倉誠得遣人委積之遺意然散貯於鄉里郊野縣都之間故所及者均遍

比年義倉專輸之州縣一有凶歉村落不能遍及矣今有仁人在上安保其無復倣此意而行之者乎

王崇慶曰古人命委吏以加惠生民而皆曰待正見備荒意

國無九年之蓄曰不足無六年之蓄曰急無三年之蓄曰國非其國也三年耕必有一年之食九年耕必有三年之食以三十年之通雖有凶旱水溢民無菜色然後天子食日舉以樂

董煟曰古稱九年之蓄者蓋率土臣民通爲之計固非獨豐廩庾而已後代失典籍備慮之意忘先王子愛之心所蓄糧儲唯計廩庾而不知國富民貧其禍尤速今州縣有常平倉義倉朝廷諸路又有封樁米斛至於大軍倉豐儲倉州倉縣倉皆不與焉但賦歛繁重民間實無所蓄耳然官之所蓄又各有司存而不敢發馴致積爲埃塵盍亦講求古人凶年通財之義乎

王崇慶曰今之公病正坐無九年之蓄然則何以攻病曰及今尚可以備三年之艾

月令季春之月天子布德行惠命有司發倉廩賜貧窮振乏絕

董煟曰古人賑給多在季春之月蓋蠶麥未發正宜行惠非特饑荒之時方行賑濟而已王崇慶曰先王季春行惠法天生育要非後世所及

宣王承厲王之烈內有撥亂之志遇裁而懼側身

脩行欲銷去之詩曰天降喪亂饑饉荐臻靡神不舉靡愛斯牲又曰靡人不周無不能止

董煟曰靡神不舉靡愛斯牲說者謂慰安人心然山川禱祠從古有之亦是古人憂畏之切至於靡人不周無不能止自非當時有實惠及民安能如是

王崇慶曰此宣王憂旱之詩然救荒之政在其中矣

隱公六年京師來告饑公爲之請糴於宋衛齊鄭

禮也莊公二十八年冬饑臧孫辰告糴于齊禮也

董煟曰春秋之時諸侯竊地專封然同盟之國猶有救患分災之義未嘗遏糴也今之郡縣不知本原至不容米下河出界回視春秋列國爲有愧矣

王崇慶曰不容米出界固大非告糴等事亦恐伯者私心

僖公十三年冬晉荐饑使乞糴于秦百里奚曰天災流行國家代有救災恤鄰道也行道有福秦於

是輸粟于晉自雍及絳相繼命之曰汎舟之役僖公十四年秦饑乞糴于晉晉人不與僖公十五年晉侯及秦伯戰于韓獲晉侯傳云晉饑秦輸之粟秦饑晉閉之糴故秦伯伐晉

董煟曰春秋於諸侯無書獲之例而經書曰獲晉侯貶絕之也春秋之世王道不絕如綫一閉糴而聖人誅之宋朝列聖視民如傷屢降詔旨不許諸路過糴坐以違制而邇來官司各專其民輒違上意此皆講求未至耳

王崇慶曰人主當發政施仁以法堯舜春秋乞糴云云之事可勿復論

僖公二十一年夏大旱欲焚巫尪臧文仲曰非旱備也修城郭貶食省用務穡勸分有無相濟此其務也

董煟曰有無相濟真救荒之良法今州縣各私其民官司各私其職莫肯通融異縣貯儲不恤鄰邑哀哉

王崇慶曰王政之通塞不係年時之豐歉必



待荒年而後有無相濟晚矣

李悝爲魏文侯作平糴之法曰糴甚貴傷民甚賤傷農若民傷則離散農傷則國貧故甚賤與甚貴其傷一也善爲國者使民無傷而農益勸故大熟則上糴三而舍一計民食終歲長四百石官糴三百石中熟糴二下熟糴一使民適足價平而止小饑則發小熟之歛中饑則發中熟之歛大饑則發大熟之歛而糴之故雖遇饑饉水旱糴不貴而民不散取有餘而補不足行之魏國國以富强

董煇曰今之和糴其弊在於籍數定價且不能視上中下熟故民不樂與官爲市最爲患者吏胥爲姦交納之際必有誅求稍不滿欲量折監陪之患紛然而起故糴買之官不得不低價滿量豪奪於民以逃曠責是其爲糴也烏得謂之和哉至於已糴之後又不能以新易陳故積而不散化爲埃塵而民間之米愈少也漢食貨志曰吏良而今行故民賴其利焉誠哉是言

王崇慶曰李悝平糶之議亦伯佐一時小策然今之司牧苟行之亦足小濟

葵丘之會五命曰無曲防無遏糶

董煟曰趙岐注云無曲防無曲意設防禁也無遏糶無止穀不通鄰國也然必當時已有

遏糶之患故齊桓因諸侯之會而預戒之

王崇慶曰若以無曲防為無曲意設防禁是防禁固甚

國語魯饑臧文仲言於莊公曰夫為四鄰之援結

諸侯之信重之以昏姻申之以盟誓固國之艱急是為鑄名器藏寶財固民之殄病是待今國病矣君盍以名器請糶于齊於是以前圭玉罄如齊告糶曰不腆先君之敝器敢告滯積以救敝邑

董煟曰饑荒之年古人雖鬯圭玉罄皆不敢惜猶以請糶今常平義倉本備饑荒內帑之積軍旅之外本支凶年若吝而不發誠未考古耳

王崇慶曰後世不如古豈獨區區救荒一節

管仲相桓公通輕重之權曰歲有凶穰故穀有貴賤民有餘則輕之故人君歛之以輕民不足則重之故人君散之以重使萬室之邑有萬鍾之藏千室之邑有千鍾之藏故大賈蓄家不得豪奪吾民矣 釋曰相桓公為桓公之相

董煟曰李悝之平糶壽昌之常平其源蓋祖於此今之和糶者務求小利以為功殊忘歛散所以為民之意

王崇慶曰平糶可矣然必李悝行之常平善

矣然必壽昌行之不然吾未見其能濟也故

古云有治人無治法

春秋之時鄭饑未及麥民病子皮餼國人粟戶一鍾是以得鄭國之民故罕氏世掌國政以為上卿宋饑司城子罕出公粟以貸使大夫皆貸司城氏貸而不書宋無饑人晉叔向聞之曰鄭之罕宋之樂二者其皆得國乎

董煟曰子皮子罕為一國之卿固與宰天下者大相遠不知其惠之所及者能幾而天之

祐善罕氏遂世掌國政於鄭樂氏遂有後於
宋蓋亦傳所謂天裁流行國家代有行道有
福理必然邪

王崇慶曰程子嘗曰一命之士苟存心於利
物亦必有濟而况為卿以輔國者乎二卿之
報無足恠也然而仁人後獲矣

哀公問於有若曰年饑用不足如之何對曰盍徹
乎曰二吾猶不足如之何其徹也曰百姓足君孰
與不足百姓不足君孰與足

董煇曰聖賢救荒大抵以寬征薄賦為先書
曰民惟邦本本固邦寧

王崇慶曰人主以儉德為貴恐不但救荒先
此而已

梁惠王曰寡人之於國也盡心焉耳矣河內凶則
移其民於河東移其粟於河內河東凶亦然察鄰
國之政無如寡人之用心者鄰國之民不加少寡
人之民不加多何也孟子告之曰狗彘食人食而
不知檢塗有餓莩而不知發人死則曰非我也歲



也王無罪歲斯天下之民至焉

董煇曰人君平居無事橫征暴斂不能使民養生喪死而無憾一遇水旱雖移民移粟孟子以爲不知本

王崇慶曰此便見孟子以大政破梁王之小惠蓋進之也


救荒活民書卷一終

特
277

国立国会図書館

タイトル『救荒活民書12巻』 請求記号 特1-277

ガラス使用



新


國

藏

書

藏

書



国立国会図書館 タイトル『救荒活民書12巻』 請求記号 特1-277

ガラス使用